



Borgarráð

Endurnýjaður samstarfssamningur við Listahátíð í Reykjavík 2024-2026

Lagt er til að borgarráð samþykki að verða við beiðni stjórnar Listahátíðar, dags. 30. júní 2023, um endurnýjun á þríhliða samning vegna Listahátíðar í Reykjavík fyrir árin 2024-2026, sem og að árlegt samningsframlag Reykjavíkurborgar til Listahátíðar á samningstímanum verði hækkað um 15 mkr. árlega, þ.e. úr 36 mkr. á ári í 51 mkr. á ári til að styðja við rekstur Listahátíðar. Gert verði ráð fyrir kostnaðinum í fjárhagsáætlun. Jafnframt er lagt til að borgarráð samþykki að veita borgarstjóra heimild til undirritunar á samningnum.

Dagur B. Eggertsson
borgarstjóri

Hjálagt:

Erindi stjórnar Listahátíðar til borgarstjóra og formanns borgarráðs vegna endurnýjunar samnings, dags. 30. júní 2023.



Reykjavík, 30. júní 2023

Erindi til borgarstjóra, Dags B. Eggertssonar, og formanns borgarráðs, Einars Þorsteinssonar

**Endurnýjun þríhlíðasamnings menningar- og viðskiptaráðuneytis,
Reykjavíkurborgar og Listahátíðar í Reykjavík**

Allt frá stofnun Listahátíðar árið 1969 og fyrstu hátíðinni sem haldin var árið 1970 hafa ríki og borg staðið saman að Listahátíð í Reykjavík og þannig tryggt að á Íslandi þrífist sterk alþjóðleg listahátíð sem stenst samanburð við flestar helstu þverfaglegu listahátíðir heims.

Listahátíð í Reykjavík er í einstakri stöðu í íslensku menningarlífi. Hún á í frjóu og góðu samstarfi við nánast allar helstu menningarstofnanir landsins auk þess að vera vel tengd bæði alþjóðlega og í grasrót lista. **Hátíðin er aflvaki samstarfs og samtals þvert á stofnanir, listgreinar og landamæri.**

Á síðari árum hefur hátíðin verið í fararbroddi í íslensku menningarlífi hvað varðar sýnileika jaðarsettra hópa í listum og aðgengi í víðasta skilningi þess orðs. Stór hluti dagskrár Listahátíðar er ókeypis, hátíðin býður upp á öfluga fjölskyldudagskrá og lögð er áhersla á viðburði í almenningsrými. Þó margt sé um að vera í miðborginni á Listahátíð þá teygir hátíðin sig til úthverfa borgarinnar, til stór-höfuðborgarsvæðisins og í auknum mæli út á land. **Enda er það leiðarljós í öllu starfi hátíðarinnar að listir og menning séu ekki forréttindi fárra heldur réttur allra.**

Þessar áherslur eru í miklum samhljómi við bæði menningarstefnu Reykjavíkurborgar 2021-2030 og aðgerðaráætlun Menningarráðuneytisins um listir og menningu til 2030.

Fjárhagsstaða hátíðarinnar og endurnýjun þríhlíða samnings 2024-2026

Núgildandi framlagssamningur gildir út þetta ár og því er komið að endurnýjun. Árið 2021 var samningur síðast endurnýjaður til þriggja ára og þá með óbreyttu framlagi frá því sem áður var.

Framlag ríkis og borgar til Listahátíðar í Reykjavík hefur ekki hækkað í krónum talið allt frá árinu 2007. Á sama tíma hefur verðlag hækkað um 150% og því er óhætt að tala um helmings skerðingu framlaga að raunvirði. Hátíðin var um tíma haldin árlega en var aftur gerð að tvíæringi árið 2016 sem leiðrétti stöðuna aðeins en því miður er staðan þannig í dag að um 40% skerðing hefur orðið á því fjármagni sem úr er að spila fyrir dagskrárgerð hvernar hátíðar. Hlutfall rekstrarkostnaðar eykst árlega og þar af leiðandi er sífellt lægra hlutfall tekna eftir fyrir hátíðina sjálfa.

Stjórnendum Listahátíðar hefur tekist að halda sjó undanfarin ár en því miður er nú komið að þolmörkum.

Laun hjá Listahátíð hafa hækkað um að meðaltali um 80% á árunum 2007-2022 en virði launa hjá hátíðinni á sama tímabili hafa lækkað að meðaltali um þriðjung miðað við meðal launavísitölu hvers árs.

Ef framlag helst það sama frá og með árinu 2024 sjáum við rekstrarkostnað fara yfir 50% tekna Listahátíðar á hátíðarári. Það þýðir að minna er til ráðstöfunar í verkefni á Listahátíð og bolmagn hátíðarinnar til þátttöku í stærri verkefnum og frumsköpun minnkar enn frekar.



Listahátíð í Reykjavík

Reykjavik Arts Festival

Löng saga Listahátíðar, gott orðspor hennar á alþjóðavettvangi og lykilstaða sem aflvaki frumsköpunar og samstarfs gerir hana að mikilvægum hluta þess vistkerfis sem íslenskt menningarlíf er. Til að halda þeirri stöðu og sækja fram frekar en draga úr úrvali og minnka aðgengi óskum við eftir því að ríki og borg hækki framlag sitt um 15 milljónir hvort, samtals 30 milljónir á ári.

Undirbúningur fyrir Listahátíð í Reykjavík 2024 er nú í fullum gangi og mikilvægt að fjárhagsstaða hátíðarinnar sé styrkt svo Listahátíð í Reykjavík verði áfram glæsilegur vitnisburður um lista- og menningarborgina Reykjavík. Viðræður við menningar- og viðskiptaráðuneyti ganga vel. Með auknu framlagi getur Listahátíð í Reykjavík lagt enn meira af mörkum til að auka aðgengi allra að einstökum menningarviðburðum sem teygja sig út í öll hverfi borgarinnar.

Virðingarfyllt,

Sigtryggur Magnason

Formaður stjórnar Listahátíðar,
fulltrúi ráðherra

Margrét M. Norðdahl

Varaformaður stjórnar Listahátíðar,
fulltrúi borgarstjóra

Tryggvi M. Baldvinsson

Stjórnarmaður
fulltrúi fulltrúaráðs